

UVODNA RIJEČ

EDITORIAL

Cijenjene kolege i kolegice,

Bliži se pet decenija kako je Geodetski glasnik dio naše i vaše svakodnevnice, te raduje činjenica da iz štampe izlazi 44-ti broj ovog, za geodete Bosne i Hercegovine, važnog časopisa. Okupljen oko iste ideje i istih ciljeva urednički odbor je, uz veliku požrtvovanost mnogih saradnika, pripremio raznolik sadržaj i ovog broja. Naučni i stručni članci, događaji i zanimljivosti iz struke, in memoriam, vijesti o diplomantima i maturantima i još mnogo interesantnih tekstova sačinjavaju broj 44 našeg časopisa. Evidentno je da je Geodetski glasnik za geodete postao “medij” koji je bez premca na teritoriji Bosne i Hercegovine. Sadržina časopisa se nalazi u svjetskim indeksiranim bazama časopisa, dostupan je na internetu – Geodetski glasnik “sustiže” svjetske trendove u svakom pogledu, iako se granice komunikacije kontinuirano i rapidno pomjeraju. U svjetlu napretka tehnologije i tehnike komuniciranja ipak pisana riječ ima svoje mjesto. Moderne generacije diplomiranih geodeta kao i studenata geodezije vrlo brzo ovladaju novim tehnologijama, brže prihvataju nove načine komuniciranja, ali se stiče dojam da zapostavljaju neposrednu komunikaciju ne uključivši se direktno u izvještavanje o svojim stručnim aktivnostima niti u objavljivanje priloga u časopisu Geodetski glasnik. Mogao bi se možda steći utisak da gube osjećaj za odgovornost i obaveze prema profesiji.

Ova godina obiluje značajnim dešavanjima i obljetnicama. Ovih dana konačno se završava gravitacijska misija GOCE koja je dala podatke za računanje geoida s do sad neslućenom tačnošću. Svjedoci smo da se obilježava 500 godina od rođenja čuvenog kartografa Merkatora, dok se u Berlinu 15. novembra ove godine organizira skup povodom 80-tog rođendana slavnog geodete plemenitog srca, profesora Helmuta Moritza, autora poznate knjige Fizikalna geodezija, prijatelja i uvaženog gostujućeg profesora Odsjeka za geodeziju, Predsjednika Internacionalne lige humanista sa sjedištem u Sarajevu. U Potsdamu je u septembru organiziran naučni skup povodom 150 godina osnivanja Internacionalne asocijacije za geodeziju IAG. Moguće je nizati vijesti i događaje koji ovu godinu čine izuzetnom za širu geodetsku zajednicu. Obiluje zanimljivim temama za pisanje. U Bosni i Hercegovini su upravo završena mjerenja apsolutnih ubrzanja sile teže.

Skrećemo pažnju našeg čitateljstva na članak u kojem je predstavljen lokalni značajan jubilej Odsjeka za geodeziju Građevinskog fakulteta Univerziteta u Sarajevu - ustanove u kojoj se već skoro pola stoljeća kontinuirano izučava geodezija.

Dakle, pod naslovom “Četiri decenije postojanja Odsjeka za Geodeziju Građevinskog fakulteta u Sarajevu” predočeni su rezultati rada institucije koja je izdala diplomu većini onih koji se danas, ne bez ponosa, predstavljaju kao diplomirani inženjeri geodezije. Te diplome otvorile su vrata njihovom zaposlenju i posredno im omogućila egzistenciju.

Roditelji su uzor svojoj djeci, nastavnici su uzor svojim đacima i studentima – ovaj prirodni zakon (može se reći fenomen) je prepoznatljiv u ovome članku. Uz ime Odsjeka veže se i izdavanje časopisa Geodetski glasnik; uredništvo prvog broja, pa i svih ostalih čine u velikoj mjeri nastavnici i saradnici upravo Odsjeka za geodeziju Građevinskog fakulteta u Sarajevu, kao što je slučaj sa sličnim časopisima u svijetu i regiji.

Uz zahvalnost svim autorima i koautorima priloga, našim recenzentima i donatorima (Federalna uprava za geodetske i imovinsko pravne poslove i kompanije Zedis d.o.o. Zenica, Geodet d.o.o. Sarajevo i GeoWild d.o.o. Sarajevo), želimo vam ugodno čitanje i pozivamo da nam šaljete svoje pisane priloge.

Uredništvo